

南北史合注

欽定四庫全書

南北史合注卷一百五十二

明 李清 撰

列傳第五十四

北史六十六

達奚武

若干惠

怡 峯

劉 亮

王 德

赫連達

韓 果

蔡 祐

辛威

梁椿

梁臺

田弘

子仁恭

孫德慈

達奚武字成興代人父長為鎮將武少儻好馳射賀拔岳征關右引為別將及岳為侯莫陳悅所害武與趙貴收駭歸平涼同翊戴周文從平悅封湏昌縣伯大統初自大丞相府中兵參軍出為東秦州刺史齊神武與竇泰高敖曹三道來侵周文欲并兵擊泰諸將多異議唯武及蘇綽與周文意同遂擒之周文進圍弘農遣武

從兩騎覘侯武與其侯騎遇即交戰斬六級獲三人而
反齊神武趣沙苑周文復遣武覘之武從三騎皆衣敵
人衣至暮下馬潛聽其軍號上馬厯營若警夜者有不
如法往往捷之具知敵情以告周文遂從破之進爵高
陽郡公四年周文援洛陽武為前鋒與李弼破莫多婁
貸文又進至河橋力戰斬其司徒高敖曹再遷雍州刺
史復從戰邛山時大軍不利齊神武乘勝進軍至陝
武禦之乃退七年詔武經畧漢川梁州刺史宜豐侯蕭

脩固守南鄭武圍之脩請服會梁武陵王肅紀遣其將
楊乾運等救脩脩更不下武擊走乾運脩乃降

周書曰武見脩據城不出恐援軍至表裏受敵乃簡
精騎三千逆擊乾運于白馬大敗之乾運退走武乃
陳俘級于城下脩知援軍破乃降

自剗門以北悉平明年振旅還京朝議欲以武為柱國
武曰我作柱國不應在元子孝前固辭以大將軍出鎮
玉壁周孝閔踐阼授柱國大司寇齊豫州刺史司馬消

難舉州來附詔武與楊忠迎消難歸武成初轉大宗伯
追封鄭國公齊將斛律敦侵汾絳武禦之敦退武築柘
壁城留開府權嚴薛羽生守之保定三年遷太保其年
大軍東伐隨公楊志引突厥自北道武以三萬騎自東
期會晉陽武至平陽後期不進而忠已還武尚未知齊
將斛律光遺武書曰鴻鵠已翔于寥廓羅者猶視于沮澤
武乃班師出為同州刺史明年從晉公護東伐時尉遲
迴圍洛陽為敵所敗武與齊王憲禦之邙山至夜收軍

憲欲待明更戰武曰洛陽軍散人情駭動不因夜速還
明日欲歸不得憲從之遂全軍返天和三年轉太傅武
微時奢侈好華飾及居重位不持威儀行常單馬左右
一兩人門外不施戟恒畫掩一扉或謂曰公位冠羣后
何輕率若是武曰吾昔在布衣時豈望富貴今日富貴
不可頓忘疇昔且天下未平國恩未報安可過事威容言
者慙而退武在同州時旱武帝敕武祀華岳岳廟舊
在山下常所祈禱武謂僚屬曰吾備位三公不能變理

陰陽不可同衆在此常祀所頒登峯展誠尋其聖與岳
既高峻人迹罕通武年逾六十惟將數人攀藤而上稽
首祈請晚不得還即于岳上藉草而宿夢一白衣來執
武手謂曰辛苦甚相嘉尚武遂驚覺並祇肅至旦雲霧
四起俄澍雨遠近霑洽帝聞之璽書勞武

周書載璽書曰公年尊德重遠涉高峯神道聰明無
不燭感公至誠甘澤斯應聞之嘉賓無忘于懷

賜綵百匹武性貪吝其為大司寇也在庫有萬釘金帶

當時實之武因入庫取歸主者白晉公護護以武勲重
不彰其過因賜之特論深鄙焉卒贈太傅十五州諸軍
事同州刺史謚曰桓子震嗣震字猛畧少驍勇走及奔
馬周文嘗于渭北校獵時有兔過周文前震與諸將競
射之馬倒而墜震足不傾躓因步走射之一發中兔顧
馬驚起遂回身騰上周文喜曰非此父不生此子賜震
雜絲一百段武成初爵廣平郡公除華州刺史震雖出
自膏腴少習武藝然頗有治方

周書曰保定四年大軍東討諸將皆奔退震軍獨全
天和三年拜柱國

周書曰四年從高祖東伐為前三軍總管五年又從
東伐克義寧烏蘇二鎮破并州進位上柱國

建德初襲爵鄭國公從平鄴賜妾二人女樂一拜大宗
伯震父嘗為此職時論榮之隋開皇初卒於家震弟基
大象末為益州刺史與王譙據蜀起兵被害

若干惠字惠保代武川人其先與魏俱起以國為姓父

樹利州從魏廣陽王深征葛榮戰沒贈冀州刺史惠以別將從賀拔岳有功及岳為侯莫陳悅所害惠與寇洛趙貴同謀翊戴周文仍從平悅拜直閭將軍從擒竇泰復弘農破沙苑惠每先登陷陣加侍中開府儀同三司封長樂郡公大統四年從魏文帝東巡洛陽與齊神武戰于河橋力戰破之七年遷領軍及高仲密舉北豫州來附周文迎之軍至洛陽齊神武屯于印山邀我惠為右軍與中軍大破之齊神武兵乃萃左軍將趙貴等戰

不利會日暮齊神武進兵攻惠惠擊之皆披靡至夜中
神武騎復來追惠惠徐下馬顧命厨人營食食訖謂左
右曰長安死此中死異乎乃建旗鳴角收軍而還神武
追騎憚惠疑有伏兵不敢逼至弘農見周文陳賊形勢
恨其垂成之功虧于一簣歎歎不自勝周文壯之乃遷
司空惠性剛質有勇力容貌魁岸善于撫御將士莫不
懷恩及侯景內附朝議欲收輯河南令惠以本官鎮魯
陽遇病卒于軍惠于諸將年最少早喪父事母以孝聞

周文嘗造射堂新成于諸將宴射惠竊嘆曰親老矣何時辨此周文聞之即日徙堂于惠宅其見重如此及卒為流涕久之惠喪至又臨撫焉加贈秦州刺史謚武烈子鳳嗣尚周文女

怡寧字景阜遼西人本姓默台因避難改焉少以驍勇聞從賀拔岳討万俟醜奴岳被害寧與趙貴等同謀翊戴周文及齊神武與魏孝武構隙周文令寧與都督趙貴赴洛陽至潼關屬孝武西遷寧即從周文拔迴洛復

潼關後以討曹泥功爵華陽縣公又從破竇秦于小關
復弘農破沙苑進爵樂陵郡公仍與元季海獨孤信復
洛陽東魏行臺任祥率步騎萬餘攻潁川峯復以輕騎
五百邀擊大破之自是威名轉盛加授開府儀同三司
及周文與東魏戰河橋時峯為右軍不利與李遠先還
周文遣班師詔原其罪拜夏州刺史大統十五年東魏
圍潁川峯與趙貴赴援至南陽卒峯沉毅有膽畧得士
卒心當時號驍將周文嗟悼久之贈華州刺史諡襄威

子昂嗣

劉亮中山人本名道德父特真位領民酋長亮少倜儻
有從橫計畧姿貌魁傑見者憚之以都督從賀拔岳西
征常先鋒陷陣侯莫陳悅害岳亮與諸將謀迎周文及
平悅後悅黨幽州刺史孫定兒仍據州不下衆至數萬
周文令亮襲之定兒以義兵猶遠未為備亮乃輕將二
千騎先豎一纛于近城高嶺即馳入城中定兒方置酒
高會猝見亮至衆皆駭愕亮乃麾兵斬定兒懸首州門

號令賊黨仍遙指城外蕭齡三騎曰出追大軍賊黨先
懼一時降服及周文置十二軍簡諸將領之亮領一軍
每征討常與怡峯俱為騎將以復潼關功尋加侍中從
擒竇泰復弘農戰沙苑並力戰有功遷開府儀同三司
大都督爵長廣公以母憂去職居喪毀瘠周文嗟其至
性每憂惜之起復本官亮以勇敢見知為當時名將無
屢陳謀策多合機宜周文謂曰卿文武兼資孤之孔明
也乃賜名亮并賜姓侯莫陳氏出為東雍州刺史為政

清靜士民安之卒于州喪還京周文親臨之泣謂人曰
股肱喪矣腹心何寄追贈太尉謚曰襄後配享周文子
昶嗣昶尚周文女西河長公主以亮功封彭國公

王德字天恩代武川人少善騎射雖不經師訓以孝悌
稱初從爾朱榮討北海王元顥又從賀拔岳討平万俟
醜奴及侯莫陳悅官岳德與寇洛等議翊戴周文除平
涼郡守德雖不知書至斷決處分良吏無以過涇州所
部五郡德常為最及孝武西遷行東雍州事在州未幾

百姓懷之賜姓烏丸氏常從周文征伐累有軍功加開
府侍中進爵河間郡公先是河渭間種羗屢叛以德有
威名拜河州刺史群羗率服後卒于涇州刺史謚曰獻
德性厚重廉慎言行無擇母年幾百歲後德終于慶嗣
小名公奴性謹厚位開府儀同三司初德喪父貧無以
葬乃賣公奴并一女營葬事因遭兵亂不復相知及德
在平涼始得之遂名曰慶

赫連達字朔周盛樂人夏主勃勃之後曾祖庫多汗因

避難改姓杜氏達性剛頗有膽力少從賀拔岳征討有功及岳為侯莫陳悅所害趙貴建議迎周文達贊成其議

周書載達言曰宇文夏州明畧過人一時之傑今日之事非是公不濟趙將軍議是也

請輕騎告周文仍迎之諸將或欲南追賀拔勝或云東告朝廷達又曰此皆遠水不救近火何足道哉謀遂定令達馳往周文見達慟哭以數百騎南赴平涼令達率

騎據彈箏峽時民皆惶懼奔走軍爭欲掠之達止之
周書載達言曰遠近民黎多受制于賊今值便掠縛
何謂伐罪弔民不如因而撫之以示義師之德

乃撫以恩信民皆悅附周文聞而嘉之加平東將軍周
文謂諸將曰當清水公遇禍日君等性命懸于賊手杜
翔周冒萬死之難遠來見及遂得同雪讎耻勞而不酬
何以勸善乃賜馬二百疋孝武入闕褒敘勲義以達首
迎元帥匡復秦隴進爵魏昌縣伯從儀同李偉破曹泥

後復弘農戰沙苑皆有功詔復姓赫連從大將軍達奚
武攻漢中梁宜豐侯蕭脩拒守積時後乃送款開府賀
蘭願德等以其食盡欲急攻取之達曰不戰獲城策之
上也無容利其子女貪其財帛仁者不為如困獸猶鬪
則成敗未可知武遂受脩降

周書載達言曰觀修士馬尚強城池猶固攻之縱克
彼此俱損如困獸猶鬪則成敗未卜況行師之道以
全軍為上武曰公言是開府楊寬等並同達謀乃受

脩降

師還遷驃騎大將軍開府儀同三司加侍中保定初為
大將軍夏州總管達雖非文吏然性質直遵奉法度輕
于鞭撻而重慎死罪性又廉儉還境胡人或饋達羊達
欲招異類報以繒帛主司請用官物達曰羊入我厨物
出官庫是欺上也命取私帛與之識者嘉其仁恕累進
爵樂川郡公位柱國薨子達嗣

韓果字阿六拔代武川人少驍雄善騎射賀拔岳西征

引為帳內擊万侯醜奴

周書曰果擊万侯醜奴及其枝黨轉戰數十合並破之
膂力絕倫披甲荷戈升陟峯巔猶馳平路雖數十
百日不以為勞

後從周文討平侯莫陳悅大統初累進爵為石城公果
性強記兼有權畧善伺敵虛實揣知情狀有潛匿溪谷
欲為間偵者果登高望之所疑處往必有獲周文以果
為虞候都督每從征行常領侯騎晝夜巡察畧不眠寢

從平實泰于潼關周文因其規畫軍以勝還賞真珠金
帶一條又從復弘農破沙苑戰河橋並有功歷朔安二
州刺史從戰印山軍還除河東郡守又從大將軍破稽
胡于北山胡地險阻人迹罕至果進兵窮討散其種落
稽胡憚果勁勇趨捷號為著翅人周文聞之笑曰著翅
之名寧戎飛將累遷開府儀同三司進爵襄中郡公保
定三年拜少師進柱國天和初年授華州刺史為政寬
簡吏民稱之卒子明嗣為黎州刺史與迫同謀被害

蔡祐字承先其先陳留圉人徙居高平因家焉父襲名著西州魏正光中万俟醜奴亂關中襲乃背賊棄妻子歸洛陽拜齊安郡守及孝武西遷始拔難西歸除岐雍二州刺史祐性聰敏有行檢襲背賊東歸祐年十四事母以孝聞及長有膂力周文在原州召為帳下親信及遷夏州以祐為都督侯莫陳悅害賀拔岳諸將迎周文周文將赴之夏州首望彌姐元進等陰有異計周文微知之召元進等入計事

周書曰太祖與祐議執元進祐曰狼子野心不如殺之太祖曰汝大決也

既而目祐祐即出外衣甲持刀直入

周書曰祐持刀直入瞋目叱諸人曰與人朝議夕謀豈是人也祐今日必斬奸人頭舉坐皆曰願簡擇

叱元進斬之并其黨伏誅一坐皆戰慄于是與諸將結盟同心誅悅周文以此重之謂祐曰吾今以爾為子爾其父事我後迎孝武于潼關以前後功封長鄉縣伯從

擒寶泰復弘農戰沙苑皆有功及從戰河橋祐下馬步
闢左右勸乘馬備急卒祐怒之曰丞相養我如子今日
豈以性命為念遂率左右十餘人齊聲大呼殺傷甚多
敵以其無繼圍之十餘重

周書載東魏人謂祐曰觀君似勇士若降必富貴祐
罵之曰死卒吾今取汝頭自當富貴何假賊官號也
祐乃彎弓持滿四面拒之東魏人乃募厚甲長刀者直
進取祐去祐可三十步左右勸射之祐曰吾曹性命在

此一天豈虛發哉敵人可十步祐乃射之中其面應弦而倒便以稍刺殺之敵乃稍却祐徐引退是戰也西軍不利周文已還祐至弘農夜與周文會周文字之曰承先爾來吾無憂矣周文驚不得寢枕祐股乃安以功追爵為公授京兆郡守高仲密舉北豫來附周文率軍援之與齊神武遇于邙山祐時著明光鐵鎧所向無敵東魏人咸曰此鐵猛獸也皆避之歷大都督遭父憂請終喪紀弗許累遷開府儀同三司加侍中賜姓大利稽氏

進爵懷寧郡公六官建授兵部中大夫周文不豫祐與
晉公護賀蘭祥等侍疾及周文殂祐悲痛不已遂得氣
疾周孝閔踐阼拜少保祐與尉遲綱俱掌禁兵時帝信
任司會李植等謀害晉公護祐每泣諫帝不聽尋帝廢
明帝為公子與祐特相友昵及即位禮遇彌隆加拜司
馬御膳每有異味輒賜祐羣臣朝宴每被別留或至昏
夜別炬鳴笳送佑還宅祐以過蒙殊遇常辭疾避之至
于婚姻尤不願結權要尋以本官權鎮原州頃之授宜

州刺史朱之卽卒于原州祐少與鄉人李穆布衣齊名
常相謂曰大丈夫當建立功名以取富貴安能久處貧
賤言訖各大笑後皆如言及從征伐為士卒先軍還諸
將爭功祐終無所競周文每歎之曰承先口不言勲孤
當代其論敘性節儉所得祿秩皆散宗族死之日家無
餘財贈柱國大將軍原州都督謚曰莊子正嗣祐弟澤
頗好學有幹能後為邛州刺史以不從司馬消難起義
被害

辛威隴西人少慷慨有志畧初從賀拔岳征伐有功假
輔國將軍都督及周文統岳衆見威奇之引為帳內

周書曰從擒竇泰復弘農戰沙苑並先鋒陷敵勇冠
一時

累遷開府儀同三司賜姓普屯氏出為鄜州刺史威時
望既重朝廷以桑梓榮之遷河州刺史頻領二鎮頗得
民和

庾信神道碑曰保定四年朝廷欲公從威里之貴乃

以魏文帝女為公夫人觀此則周待故君女猶厚況其子孫乎

周大象二年累進封宿國公卒于少傳威持重有威嚴歷官數十年未嘗有過故得以身名終無其家有義五世同居時以此稱之子永達嗣

梁椿字千年代人初從爾朱榮入洛又從賀拔岳討平萬俟醜奴仍從周文平侯莫陳悅大統中累以戰功封東平郡公位開府儀同三司周保定元年拜大將軍卒

于位贈都督恒州刺史謚曰烈椿性果毅善于撫納所
獲賞物分賜麾下故每踐敵場咸得其死力雅好儉素
不營貨產時論以此稱之于明襲

梁臺字洛都葦池人少果敢有志操從爾朱天光平閼
隴

周書曰一年中大小二十餘戰

及天光敗于韓陵賀拔岳又引為心膂岳為侯莫陳悅
所害臺與諸將翊戴周文從平悅累功

周書曰臺為平涼郡守時莫折後熾結聚輒剽寇掠
州刺史史寧討之歷時不克臺陳賊形勢兼論攻取
之策寧善而從之遂破賊

授潁州刺史賜姓賀蘭氏周孝閔踐阼爵中部縣公保
定四年拜大將軍時大軍圍洛陽久不拔齊騎奄至齊
公憲禦之有數人為敵所執已去陣二百餘步臺單馬
突入射殺兩人敵皆披靡被執者遂還齊公憲每歎曰
梁臺果毅膽決不可及也五年拜郿州刺史臺性疎通

恕以待物蒞人尤以惠愛為心不過識千餘字口占書
啟詞意可觀年過六十猶能被甲跨馬足不躡鐙馳射
戈獵矢不虛發復以疾卒

田弘字廣路高平人少慷慨有謀畧初陷万俟醜奴爾
朱天光入關弘自原州歸順及周文統衆弘求謁見乃
論時事即處以爪牙問文嘗以所著鐵甲賜弘云天下
若定還將此甲示孤也累功賜姓紇干氏授原州刺史
以弘勲望兼至故以衣錦榮之周文在同州文武並集

謂之曰人人如弘盡心天下豈不早定即授車騎大將軍儀同三司及平蜀後梁信州刺史蕭韶等未從朝化韶弘討平之又討西平叛羌及鳳州叛氏等並破之每臨陣推鋒直前身被一百餘箭破骨者九馬被十稍朝廷壯之周孝閔踐阼爵雁門郡公保定元年出為岷州刺史弘雖武將動遵法式士民賴安之三年從隋公楊忠伐齊拜大將軍

周書曰吐谷渾寇西邊宕昌羌潛相應接弘獲其二

十五王拔其七十六柵遂破平之又破齊將段韶斛
律光等拔宜陽等九城

後進柱國大將軍歷大司空少保襄州總管卒于州

庾信神道碑曰公學不專經畧觀書籍兵無師古自
得縱橫青烏甲乙之占白馬星辰之變天弘射法太
乙營圖皆成誦在心若指諸掌

子仁恭嗣仁恭性寬仁有局度歷幽州總管隋史帝受
禪進上柱國拜太子太師甚見親重嘗幸其第宴飲極

歡禮賜甚厚尋奉詔營太廟進爵觀國公卒于左武衛
大將軍贈司空諡曰敬子世師嗣次子德懋少以孝友
知名開皇初以父軍功賜爵平原郡公授太子千牛備
身丁父艱哀毀骨立廬于墓側負土成墳帝聞而嘉之
遣員外散騎侍郎元志就弔復降璽書存問賜帛及米
下詔表其閭大業中卒于尚書駕部郎

論曰周文接喪亂之際乘戰爭之餘發跡平涼撫征關
右時外虞孔熾內難方殷羽檄交馳戎軒屢駕終能蕩

清通尊克國鴻基雖稟箕廟實責成將帥達吳武若干
惠怡率劉亮王德赫連連韓果蔡祐辛威梁椿梁臺田
弘等並無資勇畧咸會風雲或效績中權或立功方回
均分休戚同濟難危可謂國之爪牙朝之禦侮者也而
武叶規文后得雋小關周瑜赤壁之謀賈詡烏巢之策
何以能尚一書興邦斯之謂矣惠德本以果毅知名而
能率由孝道雖圖史所數何以加焉勇者不必有仁斯
不然矣以赫連達之先識而加以仁恕蔡祐之敢勇而

終不以伐斯豈企及所致抑亦天性而已仁恭出內則榮顯豈徒然哉德懋道協天經亦足嘉矣

南北史合注卷一百五十二

欽定四庫全書

南北史合注卷一百五十三

固明 李清 撰

列傳第五十五

北史六十七

王 標

王 勇

宇文蚪

耿 豪

高 琳

李 和

子徽

伊婁穆

達奚寔

劉雄

侯植

李延孫

韋祐

陳欣

魏玄

泉企

李遷哲

楊乾運

扶猛

陽雄

席固

任果

王傑金城直城人本名文達父巢魏榆中鎮將傑少有

壯志每以功名自許周文奇其才謂諸將曰王文達萬人敵但恐勇敢太過耳從復潼關破沙苑爭河橋戰邛山皆以勇敢聞親侍日隆賜姓宇文氏累遷侍中驃騎大將軍開府儀同三司恭帝元年從于謹圍江陵時柵內有人喜用長稍將士登者多為所斃謹令傑射之應弦而倒登者乃得入遂拔之謹曰濟我大事者公此矢也周文閔踐阼爵張掖郡公為河州刺史朝廷以傑勲望俱重故授以本州後與隋公楊忠自漢北伐齊又從

齊公憲東禦齊將斛律光進位柱國建德初除涇州總管以忠恕為心頗為士民所慕宣帝即位拜上柱國卒追封鄂國公謚曰威

王勇代武川人本名胡仁少雄健有膽決數從侯莫陳悅賀拔岳征討功多拜別將周文為丞相從擒竇泰復弘農戰沙苑氣蓋衆軍所當必破周文歎其勇敢賞賜特隆邙山之戰

周書曰邙山之戰勇率敢死士三百人並執短兵大

呼直進出入衝擊殺傷甚多敵無敢當者

大軍不利惟胡仁及王文達耿令貴力戰皆有殊功軍
還拜上州刺史以雍州岐州北雍州擬授胡仁等然州
頗有優劣令探籌取之胡仁遂得雍州文達得岐州令
貴得北雍州仍賜胡仁名勇令貴名豪文達名傑以彰
其功進侍中驃騎大將軍開封儀同三司恭帝元年從
柱國趙貴征柔然破之爵新陽郡公賜姓庫汗氏又論
討柔然功別封永固縣伯時有別封者例聽迴授次子

勇獨請封兄子興時人義之尋進大將軍勇健猛為當時驍將然矜功伐善好論人之惡時論亦鄙之柱國侯莫陳崇勲高望重與諸將同謁晉公護聞勇數論人短乃於衆中折辱之勇慙恚疽發背卒子昌嗣

宇文蚪字樂仁代武川人驍悍有膽畧少從征討累有戰功封南安侯孝武西遷以獨孤信為行臺信引蚪為帳內都督隨信奔梁大統三年歸闕進爵為公擒竇泰復弘農及沙苑河橋之戰皆有功又從獨孤信討梁公

定破之累遷南秦州刺史驃騎大將軍開府儀同三司
周書曰十七年與大將軍王雄征上津魏興等郡並
平之又敗梁將楊乾運於白馬

蚪每經行陣必身先士卒故上下同心戰無不克卒於
金州刺史大將軍

耿豪鉅鹿人本名令貴其先家於武川豪少麤獷有武
藝好以氣陵人賀拔岳西征引為帳內岳被害歸周文
以武勇見知豪亦自謂所事得主從討侯莫陳悅及迎

魏孝武錄前後功封平原子

周書曰從擒竇泰復弘農皆以先鋒陷陣

沙苑之戰豪殺傷甚多血染甲裳盡赤周文歎曰令貴武猛所向無前觀其甲裳足驗不須更論級也進爵為公從周文戰邛山豪謂所部曰大丈夫除賊須右手拔刀左手把稍直斫直刺慎莫畏死遂大呼獨入敵人鋒刃亂下當時咸謂豪段俄奮刃還戰數合當豪前者死傷相繼謂左右曰吾豈樂殺人但壯士除賊不得不爾

若不能殺賊又不為人所傷何異逐坐人也周文嘉之
拜北雍州刺史賜姓和稽氏進侍中驃騎大將軍開府
儀同三司豪性凶悍言多不遜周文惜其驍勇每優容
之豪亦自謂意氣冠羣終無所屈李穆蔡祐初與豪同
時開府後並居豪右豪不能平謂周文曰人間物議謂
豪勝李穆蔡祐周文曰何以言之豪曰人言蔡穆蔡祐
是丞相驍悍賊豪王勇丞相咽項以在上故勝豪麤猛
皆類此卒周文痛惜之子雄嗣

高琳字季珉其先高麗人仕燕歸魏賜姓羽真氏琳母嘗被襖泗濱遇見一石光彩朗潤遂持歸是夜夢人衣冠有若仙者謂曰夫人向所將來石是浮磬之精若能寶持必生令子母驚悟舉身流汗俄有娠及生因名琳字季珉從孝武西遷河橋之役琳勇冠諸軍周文謂曰公即我韓白也復從戰邛山除正平郡守齊將東方老來寇琳擊之老中數創乃退謂其左右曰吾經陣多矣未見如此健兒

周書曰老又密使人勸琳東歸琳斬其使以聞

後加驃騎大將軍開府儀同三司侍中周孝閔踐阼爵
建為郡公武成二年討平文州氏師還明帝宴羣公卿
士仍賦詩言志琳詩末章云寄言竇車騎為謝霍將軍
何以報天子沙漠靜妖氛帝大悅曰獯獫陸梁未時款
塞卿言有驗國之福也天和三年為江陵副總管時陳
將吳明徹來寇梁孝明帝與總管田弘出保紀南城唯
琳與梁僕射王操固守江陵三城抗之晝夜拒戰凡經

十旬明徹退走梁孝明表其狀武帝乃優詔追琳入朝
親加勞問六年進柱國卒贈本官加五州諸軍事冀州
刺史諡曰襄子儒襲

李和本名慶和朔方人父僧養以累世雄豪為夏州酋
和少勇敢有識度狀貌魁偉為州里所推賀拔岳作鎮
關中引為帳內都督後從周文賜姓宇文氏周文嘗謂
諸將曰慶和累經委任每稱吾意又賜名意保定二年
除司憲中大夫封德廣郡公出為洛州刺史和前刺史

夏州頗留遺惠及有此授商洛父老莫不想望德音和
至州以仁恕訓物獄訟簡靜進柱國大將軍隋開皇元
年遷上柱國和立身剛簡老而逾勵諸子趨事若奉嚴
君以意是周文賜名市朝已革慶和乃父所命義不可
違復以和名

和有亡父之思而無故國之感忠孝不兩立洵哉言乎
二年卒贈本官加司徒公諡曰肅子徽嗣徽字廣遠性
剛毅有器幹周武帝時從皇太子西征吐谷渾又從武

帝平齊錄前後功

周書曰武帝拔晉州班師徼與齊王憲屯雞栖原憲
追齊主高緯大軍引兵西上緯遣其驍將賀蘭豹子
躡憲憲敗於晉州城北徼與楊素等力戰憲軍賴以
全復從帝破齊師於汾北乘勝下高壁拔晉陽擒高
潛于冀北俱有力焉

再進爵隋受禪遷左武衛將軍及晉王廣鎮并州妙選
府官詔徼撫晉王府軍事進爵齊安郡公時蜀王秀亦

鎮益州常謂侍臣曰安得文同王子相武如李廣達者
乎其見重如此明年突厥沙鉢略可汗犯塞詔衛王爽
為元帥擊之以徹為長史遇虜於白道行軍總管李充
請襲之

隋書載充言於爽曰周齊互競中夏力分突厥每侵
邊將輒以全軍為計莫能死戰故突厥勝時多而敗
少每輕中國今沙鉢略悉國中之衆屯據要險輕我
而無備我以精兵襲之可破也

諸將多以為疑唯徹獎成其事請同行

冊府元龜日率精騎五千出其不意

遂掩擊大破之沙鉢略棄所服金甲潛草中而遁以功
加上大將軍沙鉢略因此稱藩開皇十年進柱國及晉
王為揚州總管以徹為司馬三徙封乃為城陽郡公後
突厥犯塞徹復領行軍總管破之及左僕射高穎得罪
以徹素與穎善因被疎忌後出怨言帝聞召入卧内賜
宴言及生平因遇鴆卒大業中其妻元氏為孽子安遠

誣以呪詛伏誅

隋書元氏作宇文氏既云為孽子所誣則伏誅者安
遠乎抑宇文氏乎語意不明

伊婁穆宇文干代人父靈善騎射為周文所知嘗謂之
曰若伊尹阿衡於殷致主堯舜鄉既姓伊庶不替前緒
因賜名尹歷衛將軍隆州刺史盧奴縣令穆弱冠為周
文帳內親信以機辯見知歷通直散騎常侍嘗入白事
周文望見悅之字之曰奴干作儀同面見我矣拜儀同

三司周孝閔踐阼進驃騎大將軍

周書曰天和時唐州山蠻恃險逆命移卒軍討之蠻首等保據石窟十四處移分軍進討旬有四日並破之酋獲六千五百人

建德中卒

達奚寔字什伏代河南洛陽人父顯相武衛將軍寔少修立有幹局從周文擒竇泰復弘農破沙苑皆力戰有功累遷相府從事中郎寔性嚴重深見器遇

周書曰魏廢帝二帝大軍伐蜀以寔行南岐州事先
是山氏生獷歷世不供賦役寔導之以政氏人感悅
並從賦稅大軍糧餽咸取給焉

六官建行蕃部中大夫進爵平陽縣公周保定初卒於
刺史諡曰恭子豐嗣

劉雄字雄雀臨洮子城人少辯機慷慨有大志初為周
文親信後拜中大夫兼中書舍人賜姓宇文氏周孝閔
踐阼加大都督天和中

周書曰齊將斛律明月卒衆逼通關城齊王憲令雄
往使責其負約雄辭義辯直齊人憚之

累遷開府儀同三司

周書曰雄攻齊所築伏龍等五城又齊將段韶等嘗
圍柱國宗文盛於長城以西時營外先有長塹大將
韓歡與韶戰不利雄身負排率所部二十餘人據塹
力戰韶等乃去

歷內史中大夫侯正武帝嘗從容謂曰古人云富貴不

歸故鄉猶錦衣夜遊今以鄉為本州乃以雄為河州刺史雄先已為本縣令復有此授鄉里榮之及皇太子西征吐谷深雄自涼州從滕王迥先入功居多

周書曰迥軍去伏候城二百餘里使雄先至城東舉火與大軍應渾洮王率七百餘騎逆戰雄時所部數百人並分遣斥候在左右者僅二十許人雄即率與戰與首七十餘僅亡其三騎自是從迥連破之

加上開府儀同三司從平并州拜上大將軍進爵趙郡

公平鄴城進柱國宣政元年突厥寇幽州雄戰歿贈毫
州總管子昇嗣以雄死王事授儀同大將軍

侯植字仁幹其先上谷人家於北地之三水植少儻
有大節容貌奇偉武藝絕倫

周書曰正光中羣盜蜂起植散家財募勇敢討賊
仕魏為義州刺史甚有政績後從孝武西遷賜姓侯伏
氏從周文破沙苑戰河橋進大都督涼州刺史宇文仲
和據州作逆植從開府獨孤信討擒之封肥城縣公賜

姓賀屯氏從于謹平江陵進驃騎大將軍開府儀同三司周孝閔踐阼進爵郡公時帝幼冲晉公護執政植從龍恩時為護所親及護誅趙貴諸宿將多不自安植謂從兄龍恩曰主上春秋既富安危繫於數公若多誅戮自立威權何止社稷有累卵之危恐吾宗亦緣此敗周書載植曰今共為唇齒尚憂不齊況以纖介自相夷滅恐天下因此解體

兄安得知而不言龍恩竟不能用植又承間語護曰

周書載植曰君君之分情同父子理湏同休戚期之
始終

公以骨肉之親當社稷之寄願推誠王室擬迹伊周
周書曰使國有太山之安家傳世祿之盛

則率土幸甚獲曰我誓以身許國卿豈謂吾有他志耶
又聞其先與龍恩言陰忌之植懼不免禍遂以憂卒贈
大將軍平州刺史謚曰節子定嗣及護伏誅龍恩及其
弟萬壽並預禍武帝以植忠於朝廷特免其子孫

李延孫伊川人父長壽性雄豪少與蠻酋結託侵掠關南魏孝昌中朝議大其為亂乃以長壽為防蠻都督給以鼓節長壽盡其智力防遏羣蠻伊川左右寇盜稍息永安後長壽招集叛亡徒侶日盛孝莊籍其力用因而撫之累遷北華州刺史賜爵清河郡公及孝武西遷長壽率勵義士拒東魏後為黃州刺史東魏遣行臺侯景攻之城陷遇害追贈太尉延孫亦雄武有將率才少從長壽征討以勇敢聞賀拔勝刺史荊州表延孫為都督

肅清鵠路頗有力焉及長壽被害延孫乃收集父衆自
孝武西遷朝士流亡廣陵王元欣錄尚書長孫稚頴王
元斌之安昌王元子均及建寧江夏隴東諸王并百官
等携持妻子來投延孫者延孫率衆衛送并贈以珍玩
咸達關中齊神武患之遣行臺慕容紹宗等數道攻擊
延孫獎勵所部出戰大破之乃授延孫京南行臺兼節
度河南諸軍事又進車騎大將軍儀同三司大都督賜
爵華山郡公延孫既蒙重委每以克清伊洛為己任頻

以寡擊衆威振敵境大統四年爲長史楊伯蘭所害贈
司空子人傑有父祖風官至開府儀同三司改封潁川
郡公

韋祐字法保京兆山北人以字行爲州郡著姓父義上
洛郡守法保少好遊俠而質直少言所與交游皆輕猾
亡命

周書曰人有急難相投者多保祐之雖屢被追捕終
不改其操

父歿事母以孝聞慕李長壽為人遂娶其女因寓居關南正光末王公避難者或依之多得全濟以此為貴游所德及孝武西遷法保赴行在所封固安縣男及長壽被害其子延孫收長壽餘衆守禦東境朝廷恐延孫兵少乃除法保東洛州刺史配兵數百以授延孫法保至潼關弘農郡守韋孝寬謂曰恐子此後難以吉還法保曰古人稱不入虎穴不得虎子安危之事未可預量

周書曰縱為國隕身亦非所恨

遂倍道兼行與延孫兵接

周書曰東魏陝州刺史劉貴以步騎千餘邀之法保
命所部為圓陣且戰且前數日乃得與延孫兵接

乃并勢置柵於伏泥未幾周文追法保與延孫還朝賞
勞甚厚除河南尹及延孫被害法保乃率所部據延孫
柵

周書曰延孫頻與東魏交兵每身先士卒單身陷陣
是以戰必被傷

嘗與東魏戰流矢中頸從口中出久乃蘇大統九年鎮九曲城及侯景以豫州附法保率兵赴景景欲留之法保疑其貳乃固辭還鎮十五年加驃騎大將軍開府儀同三司尋遷爵為公會東魏遣軍送糧饋宜陽法保潛邀中流矢卒於陣諡曰莊子初嗣

陳欣字永怡宜陽人少驍勇有氣俠姿貌魁岸同類咸敬憚之魏孝武西遷欣於於辟惡山招集勇敢少年寇掠東魏仍密遣使歸附授立義大都督賜爵霸城縣男

累遷宜陽郡守

周書曰大統十六年欣敗齊將東方老於石泉俘獲甚衆東魏每遣兵送米饋宜陽欣擊之而每多克獲恭帝元年又大破齊將段孝先於九曲

恭帝元年進驃騎大將軍開府儀同三司加侍中賜姓尉遲氏周文以欣著績累載贈其祖昆及父興孫俱為儀同三司東魏洛州刺史獨孤永業號有智謀往來境上欣與韓雄等恒令間諜覘其靜動齊兵每至輒破之

故永業深憚欣等不敢為寇周孝閔踐阼進爵許昌縣
公卒於熊州刺史欣與韓雄里閭姻婭少相親昵俱總
兵境上三十餘載每禦扞二人相赴常若影響故數對
勦敵而常保功名雖並有武力挽彊射中欣不如雄散
財施惠得士衆心雄不如欣身死日將吏荷其恩德莫
不感動子萬敵嗣朝廷以欣雅得士心還令萬敵領其
部曲

魏玄字僧智其先任城人後徙新安玄少慷慨有膽畧

孝武西遷東魏北徙人心各懷去就玄每率鄉兵抗拒東魏邙山之役大軍不利宜陽洛州皆為東魏守而玄母及弟並在宜陽玄念忠孝不兩立乃率義徒還關南鎮撫周文手書勞之封廣宗縣子周保定元年累遷驃騎大將軍開府儀同三司鎮閩韓

周書曰天和元年陝州總管尉遲綱遣玄等率步騎五百人擊東魏洛州刺史獨孤永業於鹿盧交南永業衆二萬餘玄輕將五騎前覘之猝與遇便即交戰

殺傷數十人永業遂退

遷雄州刺史政存簡惠士民悅之進爵為公及齊將斛律光率衆向宜陽兵威甚盛玄率衆禦之每戰輒克後以疾卒

泉公字思道上洛豐陽人世雄商洛自晉東度常貢屬江東曾祖景言魏大延五年率鄉里歸化仍引王師平商洛拜建節將軍假宜陽郡守世襲本縣令父安志復為建節將軍宜陽郡守領本縣令公九歲喪父哀毀類

成人服闋襲爵年十二鄉人皇平陳合等三百餘人詣
州請公為縣令州為申上時吏部尚書郭祚以公年少
請別選終此一限令公代之宣武詔依皇平等所請也
俗事道尤重老子之術公雖童幼而好學恬靜士民安
之尋以母憂去職縣中父老復表請起復本任後除上
洛郡守及蕭寶夤反遣兵趨青泥圖取上洛豪族泉杜
二姓密應之公與刺史董紹掩襲二姓二姓散走寶夤
亦退遷浙州刺史別封涇陽縣伯永安中大破梁將王

玄真於順陽除東雍州刺史進爵為侯部民楊羊皮太保椿從弟恃椿侵擾百姓守宰多被陵侮皆畏不敢言公收之將加極刑楊氏慙懼闔宗請恩自是豪右無敢犯者

愚按楊門不率一見寇雋傳再見泉公傳乃知魏書所作佳傳出自魏收媚楊愔者未可盡信

性情約纖毫不擾於人在州五年每於鄉里運米自給梁魏興郡與洛州接壤表請內屬詔公為行臺尚書撫

納之大行璽賀拔岳以公昔蒞東雍為吏民所懷乃表
公復為刺史詔許之蜀人張國雋聚黨剽掠州郡不能
制公戮之閭境清肅及齊神武專政孝武有西顧之心
欲委公山南乃除洛州刺史未幾帝西遷齊神武率眾
至潼關公遣其子元禮禦之神武不敢進上洛人都督
泉岳岳弟猛畧與順陽人杜窋等謀翻洛州應東魏公
知之殺岳及猛畧傳首詣關大統元年加開府儀同三
司兼尚書右僕射進爵上洛郡公公志尚廉慎每除一

官憂見顏色寢食輒減至是頻讓魏文帝手詔不許三年高敖曹圍通州城杜密為其鄉導公拒守旬餘矢餘援絕城乃陷謂敖曹曰泉公力屈志不服也及竇泰被擒敖曹退走遂執公而東以密為刺史公臨發密戒二子元禮仲遵曰吾生平志願不令令長幸逢聖會位亞台司今爵祿既隆年齒又暮前途夷險抑亦可知汝等堪立功効

周書載公曰爾等志業方強忠孝不可兩全宜各為

身名弗相隨，寇手但得汝等致力。本朝吾無餘恨，弗得以我在東，遂虧臣節也。乃揮涕而訣。聞者莫不憤歎。尋卒於鄴。元禮少有志氣，好弓馬，頗閑草隸。有士君子風，為散騎常侍及洛州陷，與公俱被執而東。元禮於路逃歸，時杜密雖為刺史，然巴人素輕杜，重泉及元禮至，與仲遵相見，感父臨別言，潛與豪右結託，遂率鄉人襲州城，斬密，傳首長安。朝廷嘉之，詔襲州城刺史從周文戰長苑中，流矢卒。子貞嗣，仲遵一名恭，少謹寔，涉獵

經史年十三為郡主簿十四為縣令

愚按泉氏父子俱以少年為令何奇也

及長有武藝高教曹攻洛州與公力戰拒守矢盡以棒
杖扞之為流矢中目不堪復戰及城陷士卒歎曰若二
郎不傷豈至於此公之東也仲遵以被傷不行後與元
禮斬寇以功封豐陽縣伯東豫州刺史及元禮戰歿復
以仲遵為洛州刺史頗得譽

周書曰仲遵夙稱幹畧為鄉里所歸及為本州頗得

嘉譽

大統十三年行荊州刺史事梁司州刺史柳仲禮每為
邊寇周文令仲禮率鄉兵從開府楊忠討之梁隨郡守
桓和拒守不降忠謂諸將曰先取仲禮則桓和不攻自
服仲禮對曰若棄和深入仲禮未即就擒則首尾受敵
此危道也

周書曰若先攻和指麾可克克和而無反顧之憂
忠從之仲禮以計由已出乃先登城遂擒和從擒仲禮

又獲之進驃騎大將軍開府儀同三司復行荊州刺史
十三州諸軍事尋遭母憂請終喪不許大將軍王雄南
征上津魏興仲遵從雄討平之遂於上津置南洛州以
仲遵為刺史仲遵留情撫接士民安之初蠻帥杜青和
自稱巴州刺史以州入附朝廷因所據授之仍隸東梁
州都督青和以仲遵善於撫御請隸仲遵朝議以山川
非便弗許青和遂結安康首帥黃衆寶等舉兵共圍東
梁州遣王雄討平之改巴州為洵州隸於仲遵先是東

梁州刺史劉孟良在職貪婪民多背叛仲遵以廉簡處之羣蠻帥服仲遵雖出自己夷有方雅之操歷官處皆以清白見稱朝廷又以其父臨危抗節乃令襲爵上洛郡公舊封聽廼授一子尋出為都督金州刺史卒官贈大將軍三州刺史謚曰莊子暉嗣

李遷哲字孝彥安康人世為山南豪族仕於江左父元直仕梁歷東梁衡二州刺史散騎常侍沌陽侯遷哲少修立有識度慷慨善謀畫起家文德主帥其父為衡州

留遷哲本鄉監紀部曲事時年二十撫馭羣下甚得其情後襲爵沌陽侯位都督東梁州刺史侯景篡逆遷哲外禦邊寇自守而已大統十七年周文遣達奚武王雄等畧地山南遷哲軍敗遂降於武然猶意氣自若武執送京師周文責以不早歸國答曰世受梁恩不能死節寔以此愧耳周文深嘉之恭帝初直州人樂熾洋州人黃國等連結為亂周文深嘉之信著山南乃令與開府賀若敦同經畧熾等尋並平蕩仍與敦南出狗地遷哲

先至巴州入其封郭梁巴州刺史年安民開門請降安民子宗微等猶據巴城

周書巴城作琵琶城

不下遷哲破克之軍次鹿城城主遣使請降遷哲謂其衆曰納降如受敵吾觀其瞻視猶高得無詐也因遂不許梁人果設伏道左邀擊哲遷哲破之遂屠其城自此巴濮之人降歟相繼軍還周文賜以所服紫袍玉帶及所乘馬加授侍中驃騎大將軍開府儀同三司除

直州刺史即本州也仍給軍儀鼓節令與田弘同討信
州

周書曰軍次并州梁刺史杜滿送款進克疊州遷哲
每率驍勇為先鋒所在攻戰無不身先士卒凡下十
八州拓地三千餘里

時信州為蠻酋向五子王等所圍弘遣遷哲赴援比至
信州已陷五子王等聞遷哲至狼狽遁遷哲入據白帝
賀若敦等復至遂共追五子王等破之及田弘旋車周

文令遷哲留鎮白帝信州先無倉儲軍糧匱乏遷哲乃
敗葛根造粉兼米給之遷哲亦自取供給時有異膳即
分賜兵士有疾患者又親加醫藥軍中感之人思效命
黔陽蠻田烏度田烏唐等每抄掠江中為士民患遷哲
隨機出討殺獲甚多諸蠻畏威各送糧餼又送子弟入
質者千餘家遷哲乃於白帝城外築城處之并置四鎮
以靜岐路自此寇抄頗息軍糧贍給周明帝初授都督
信州刺史

周書曰時蠻酋蒲徹為隣州刺史舉兵反遷哲將討之諸將以途阻憚行遷哲曰夫蒲徹蕞爾之賊擒之方畧已在吾度內諸君見此小寇便有憚心後遇大敵將何以戰遂率兵七千擊之拔其五城

武武元年朝京師帝甚禮之賜甲第及莊田等天和三年進大將軍詔遷哲率金上等諸州兵鎮襄陽五年陳將章昭達攻逼江陵梁孝明帝告急於襄州衛公直令遷哲往救遷哲率所部守江陵城外

周書曰與陳將程文季交戰兵稍却遷哲親自陷陣
手殺數人會救至陳人乃退陳又因水泛長壞龍川
寧朔陽引水灌城城中驚擾遷哲乃先塞北堤止水
又募驍勇出擊頗有斬獲衆心稍定俄敵又入郭內
焚民家遷哲乃自率騎云云

自率騎出南門又令步騎自北門出兩軍首尾邀之陳
人多投水死是夜陳人又竊於城西堞以梯登城登者
已百數人遷哲又率驍勇捍之陳人復潰俄大風暴起

遷哲乘間出兵擊其營陳人大亂殺傷甚衆江陵總管
陸騰復破之西隄陳人乃遁建德二年再進爵安康郡
公三年卒於襄州贈金州總管謚曰武遷哲累業雄豪
為鄉里所服性復華侈厚自奉養妾媵至百數男女六
十人緣漢千餘里問第宅相次姬媵有子者分處其
中各有僮僕侍婢閹人守護遷哲每鳴笳導從往來其
間縱酒歡讌盡生平之樂子孫叅見或忘其年名者披
簿審之長子先遷哲卒第六子敬猷嗣還統父兵位儀

同大將軍

楊乾運字玄邈儻城興勢人少雄武為鄉閭信服

周書曰弱冠辟州主簿

為安康郡公陷梁歷潼南梁二州刺史及武陵王蕭紀
稱尊號以乾運威服巴渝拜梁州刺史鎮潼州時紀與
其兄湘東王繹爭帝乾運兄子畧勸乾運歸附

周書載畧說乾運曰自侯景逆亂江左沸騰今大賊
初平生民離散理宜同心戮力保國寧民今兄弟尋

戈敗道也可謂朽木不雕世衰難佐今若適彼樂土
送款關中必當功名兩全

乾運然之會周文令乾運孫法洛至略即夜送之乾送
乃送款周文密賜乾運鐵券授開府儀同三司侍中梁
州刺史安康郡公及尉遲迴征蜀遂降迴迴因此進軍
成都數旬尅之及至京禮遇隆渥尋卒於長安贈尚書
右僕射

扶猛字宗略上甲黃土人其種落號曰白獸蠻猛仕梁

位南洛北司二州刺史魏廢帝元年以衆降周文厚加
撫納割二郡為羅州以猛為刺史令從開府賀若敦南
討信州敦令猛直道所由之路人迹不通彼時猛梯山
捫葛備歷艱阻

周書曰時雪深七尺糧運不繼猛獎勵士卒晝夜而
行

遂入白帝城撫慰民夷莫不悅附以功進開府儀同三
司俄信州蠻反猛復從賀若敦平之爵臨江縣公後從

田弘破漢南諸蠻進大將軍

陽雄字元略上洛邑陽人累葉豪族父猛

周書曰魏正和中万俟醜奴作亂關右以猛商洛首
望擢為大谷鎮將以禦之元顥入洛魏孝莊渡河范
陽王誨脫身投猛猛保藏之俄廣陵王恭偽瘖疾復
來歸猛猛亦深相保護

從孝武西遷以功封鄆陽伯雄起家奉朝請以軍功

周書曰從于謹攻盤豆柵復從李遠經沙苑陣並力

戰有功

封安平縣侯得子孫相襲拜邑陽郡守

周書曰後入洛陽戰河橋解玉壁圍迎高仲密援侯
景兼有戰功世襲邑陽郡守除洵州刺史俗雜賓渝
民多輕滑雄威惠相濟夷夏安之

累遷平州刺史

周書曰時寇亂後戶多逃散雄在所安撫民並安輯
除通洛防主雄處疆場務保境息民接待敵人推誠

伏信齊洛州刺史獨孤永業移書稱美之

歷大將軍遷江陵總管封魯陽縣公卒於鎮追封郡公
謚曰懷雄善附會能自謀身故任兼出內保全爵祿子
長寬嗣

席固字子堅其先安定人因姚氏之亂寓居襄陽仕晉
為建威將軍遂為襄陽著姓固少有遠志梁大同中為
齊興郡守久居郡職士多附之遂有親兵千餘人梁孝
元時遷興州刺史軍人募從者至五千餘人固欲自據

一州以觀其變

周書曰固圖內屬謂其腹心曰今梁氏失政揚都覆
役湘東不能復仇雪恥而骨肉相殘宇文丞相創啟
伯基携招以禮吾決意歸之

大統中以地歸魏時周文方南取江陵西定蜀漢聞固
至甚禮遇之就拜使持節驃騎大將軍開府儀同三司
大都督侍中湖州刺史啟求入覲及至進爵靜安郡公
尋拜昌歸憲三州諸軍事昌州刺史固居家孝友蒞官

頗有聲績卒於州贈大將軍五州刺史謚曰肅敕襄州
賜其墓田子雅嗣雅性方正少以孝聞位大將軍

任果字靜鸞南安人本方隅豪族父襄仕梁為沙州刺
史新巴縣公果性勇決志在立功魏廢帝元年率所部
來附周文嘉其遠至待以優禮果因面陳取蜀策深納
之乃授沙州刺史從尉遲迥伐蜀尋進授驃騎大將軍
開府儀同三司及成都平除始州刺史周文以其方隅
首領早立忠節封安樂郡公賜鐵券聽相傳襲并賜路

車駟馬及儀衛等以光寵之尋為刺客所害

論曰王傑王勇宇文蚪耿豪高琳李和伊婁穆侯植等咸以果毅之姿効節擾攘之際各能屠堅覆銳自致其功高爵厚祿固其宜也無求備於一人信矣夫文士懷溫恭之操其弊也懦弱武夫稟剛烈之資其弊也敢悍故有使酒不遜之禍拔劍爭功之尤大則莫全其生小則僅而獲免耿豪王勇不其然乎李延孫韋祐陳欣魏玄等以勇畧之姿受扞城之委灌瓜贈藥雖愧昔賢禦

侮折衝足駕前烈用能觀兵伊洛保據崑崙高氏阻西
路之謀宇文緩東貢之慮皆其力也泉公長自山谷臨
難慷慨其人臣之節豈非蹈仁義之徒歟元禮仲遵
成功業克負荷矣李遷哲楊乾運席固之
徒其屬其咸知委質遂享爵位以保終始觀遷哲
觀周文有尚義之氣乾運受任武陵乖人事之道若乃
校其優劣不可以同年而語陽雄任兼文武聲其
抑亦志能之士也

南北史合注卷一百五十三